

四庫全書

史部

欽定四庫全書

史部

硃批諭旨卷一百二十五之十七

臣 永瑤 恭 校

編 修 臣 裴 謙 覆 勘

總校官中書 臣 朱 鈐

校對官助教 臣 卜 惟 吉

謄錄監生 臣 魏 溥 耀

欽定四庫全書

硃批諭旨卷一百二十五之十七

硃批鄂爾泰奏摺

雍正九年正月二十八日雲貴廣西總督

臣鄂爾

泰謹

奏爲逆首全獲各路蕩平事竊照烏賊一案自十二

月十七日已將前事具摺奏

聞臣因地方雖經恢復逆首猶未盡擒則根株尚存後

患未熄隨更嚴飭軍前凡祿氏逆族及逆黨頭人
一孽未盡則罪不抵功一寨未清則賞不勝罰烏
蒙所屬則專責之哈元生徐成貞韓勲等東川所
屬則通檄各將詳切指示獎其前勞策其後效寬
其已往望其將來總期早結大案務爲永圖節據
哈元生等報稱分遣各將帶領官兵搜山捕箐猱
賊皆潛匿深林嘯聚險碕遇兵則拒敵勢急則奔
逃各路每日被官兵鎗礮打死刀箭傷死滾巖投

江而死者多寡不等其活捉追擒并搜獲逆賊大小男女兵器什物牛羊馬匹亦多寡不等凡屬賊巢業已掃蕩一空然而祿萬福一日不獲賊情一日觀望擒賊擒王尤不可稍懈續據徐成貞報稱躡得祿萬福自破鼠堽復逃回魯甸後箐密遣本標把總賴君翼帶兵前往令開化把總張有禮與鄉導張廣扮作夷人分路捕踪閱六晝夜於十二月二十四日找著祿萬福隨勸誘招安祿萬福因

同奶公羅士賢即羅阿摸家人李洪義並帶出漢人江文俊戈撒等二十八戶投至行營及訊據各供其魯甸謀反頭人則有段良伯段璠奔苴鼠壽長顧延康顧鄉約江孔澤李洪義等其烏蒙謀反頭人則有龍山甲甲催黑窩切黑窩蘇甲庠沮西戈魯凹箴所大木那二木那惟鳩高魯維業等其東川謀反頭人則有祿良珍祿良宰祿承爵祿承鼎祿天錫蘇八十等臣通查此案造謀者祿鼎坤

指使者祿萬福知情者祿鼎新號召期約者魯甸
頭人不待及期而啟覺者烏蒙頭人聞風響應而
起者東川頭人也今奔苴顧鄉約顧延康龍山甲
甲庚沮西戈切黑窩等皆已臨陣梟斬段良伯段
璠鼠壽長江孔澤李洪義魯凹蔑所二木那高魯
維業等皆已拏獲而未獲者止魯甸之李六斤李
固老李烏蒙之大木那惟鳩等不過數人是魯甸
烏蒙之逆首皆已全獲而兇獍且勦屠殆盡矣至

東川一境則祿良珍等為之倡而祿氏蠡起者甚
衆祿良貴祿良相等乘勢剗厰統衆作叛川員雖
協力擒勦而首逆未獲亦難容刻緩臣經通飭東
川軍前并行川省謂該將等近來攻取似少知愧
憤若從前兵到即進賊敗即追毫無觀望奮勇圖
功則此時兇獍成擒久矣乃賊智狡詐竝不知速
攻賊穴險深又不能預探臨時方覺勝算何來仰
照節次牌文銳意屠勦不搗賊巢毋得旁及不獲

逆首毋得空回各路將領皆當熟思凜遵立身以
報

國其餘咨行半多嚴切卽川將亦不敢少寬自此以
後始節據東川各將報稱於十二月二十八日拏
獲祿良宰祿良珍於正月初十日拏獲祿承爵十
六日拏獲祿承鼎二十四日拏獲祿天錫此外所
獲頭目如蘇八十阿擢等甚多而總以祿氏爲最
其川界之祿良貴祿良相屢據川鎮詳請以未便

即擒俟事竣拏解

臣

復檄飭嚴催於正月初六日

拏獲祿良貴初十日拏獲祿良相此外所獲要犯如殺土司安永長之碧薩及搶廠之捉固老大戈則等亦多而亦以祿氏爲最是東川及川界之逆首並無漏網而斬殺之兇獍亦且數千人矣至於祿鼎坤之兄惟固於祿萬福未獲之先已經擒解帶傷身故祿鼎坤之幼子祿萬華於祿萬福未獲之先已經擒解自徐成貞招擒祿萬福而倡亂之

羅士賢江孔澤從逆之李洪義及已殺之顧延康
伊弟顧阿黑伊妻鮑氏并段璠阿黑家口等犯與
龍山甲甲管下逆賊沙那等犯一併就擒者成貞
之力也梟斬倡逆大頭人庚沮生擒倡逆大頭人
魯凹篋所併伊家口等犯者韓勲之力也梟斬祿
鼎坤之兄惟固首級生擒大白迫領兵頭人拖布
普豆梟斬老篋所家人鋪額及逆目戛布生擒烏
蒙府奶公管下之者書大耆老之妾辰柱并各家

口等犯者則副將楊馥等生擒龍山甲甲之兄龍
山未未及擦拉蔑所之兄朶馬無威並逆目以拍
窩威業逆目沙租與祿萬福羽黨阿戛等犯逆蠻
頭人戛奔阿母故戛奔阿代等犯并梟斬各逆犯
者則副將劉朝貴叅將康世顯遊擊王友文等生
擒祿萬華劉明齡梟斬魯甸頭人顧鄉約魯甸大
旗長生并祿萬華家口等犯者則遊擊區明王聯
封何元守備陳上志張其貴等生擒倡逆頭人鼠

壽長魯甸逆目暴保正烏蒙逆目鼠阿固布果沙
虐納苴暮麼沙補谷固者則遊擊張翰彬守備張
國用陳上志等梟斬魯甸首惡頭人奔苴及逆賊
等犯者則叅將南天章遊擊王聯封區明韓雯鵬
守備張其貴等其與奔苴倡謀者爲段良伯由魯
甸叛起者爲段璠一併生擒與段良伯家人沙戈
一同解到者則威寧州知州趙世燕以上皆係烏
蒙逆首要犯自哈元生攻破鼠壘殺死龍山甲甲

催黑窩之後各逆皆奔逃四散而祿萬福無所倚
仗又聞祿鼎新及阿業祿萬全父子投歸韓勲可
以全活是以授首行營哈元生復親行搜捕斬取
逆目戛布阿虐首級及逆目純苴阿母固首級又
生擒純苴阿母固之叔魯歹等犯至於東川一路
生擒逆首祿良珍祿良宰及祿良珍之門子陳德
佃戶小五奶公五租五租之弟紫利者則叅將南
天章等生擒逆首祿承爵及祿承爵之家奴者卡

五卽并逆目拖木麻色及拖木麻色之妻并子戈
期卽革等犯者則守備林梧鳳等生擒逆首祿承
鼎并跟隨逆賊之卽也戈麻母格李得沙租等犯
者則把總胡應聘等生擒者海逆目祿承爵之羽
黨母睢恩機洗業曲烏沙得三犯又獲逆目氣鳩
一犯黑支魯機一犯阿紅麻色者測一犯阿摧一
犯阿紅麻色租者一犯補必麻色者華一犯阿固
沙則一犯隨皆梟首者則守備孫謀等唯祿天錫

毫無消息正在嚴飭搜擒適委糧道黃士傑前往
東川烏蒙一路調劑善後事宜於正月二十四日
行至野豬冲祿天錫投至營盤撥兵押解前來則
東川祿氏逆首皆已盡獲至若生擒搶廠作亂之
逆犯祿良貴及同夥捉固老大并捉固老大之子
戈則等犯者則川遊擊張榮守備孟元恩等生擒
搶廠作亂之逆犯祿良相及同夥之者則阿屈改
三戈業吳堪等犯者則川遊擊楊澤厚等其有雖

非倡逆之人而亦係逆目要犯或逆夥親丁如梟
斬逆賊魯直你嗟阿暑等三犯梟斬長保魯得等
三犯生擒逆賊者他等十三犯者則遊擊王先等
生擒祿萬福管下之查薄等八犯梟斬祿鼎坤管
下穿營兵衣甲自供殺人不諱之二十二犯擒斬
段良伯管下之二十三犯生擒賊目翁作覺阿固
及伊子六魯等家口九犯并羽黨依都阿底阿的
卑諸松諸者拍未直及阿的家人者革等犯者則

遊擊區明張翰彬等生擒魯甸頭人烏那格老李
管下之逆賊擒獲李六斤並伊壻那郭家眷男婦
等犯者則遊擊范昉等生擒烏蒙頭人木納風子
管下之魯紀魯窩魯業魯迫等八犯并家口等犯
者則遊擊韓雯鵬等生擒祿良珍之妻陸氏孀母
安氏并男婦家口等犯者則叅將梁彪等生擒打
蕨溝逆賊者戛者卜等犯及逆目拖布管下等犯
者則遊擊曾長治生擒小烏蒙頭目迭馬甲甲母

子并伊頭人呼梯及賊奴眷口等二十犯生擒烏
蒙土府管下逆目雞約等犯又生擒奎鄉拒敵之
逆賊祖虐阿戲頗格等犯者則守備李世祿等生
擒施額法漏之母并法漏者約家口阿底者則之
父等犯生擒烏蒙賊目拖布并拖布妻女等犯解
獻補卧管下頭人抱梯雨者首級并雨者之兄雨
窩及其子姪穿營兵號衣等犯者則千總譚盛元
臬斬龍山甲甲管下之常富阿合者補魯止等犯

梟斬高魯管下之者挖補者免沙沮色免四犯生擒大木那管下之黑補等犯生擒烏蒙頭人拖白香之子位位等犯者則千總蕭得功等生擒賊目鼠壽長之叔阿革等犯者則千總胡大勇生擒烏蒙頭目阿覺者則千總鄒大志梟斬祿萬福管下逆賊十餘犯生擒逆賊曲目等犯者則把總賴君翼生擒魯甸頭目阿客者則把總劉林興生擒大木那之妻阿嫩子戈奈等犯者則把總張問明生

擒馬鞍山賊首頗噶等犯者則把總李天秩生擒
逆賊者奈等犯者則土目那德洪臣查此番出師
自鎮協而下以及叅遊并并目兵練無不奮勇爭
先窮搜力勦統計逆首逆黨及附從兇獍前後臨
陣殺傷并滾崖投江自殺自盡者已萬餘人擒獲
搜獲訊明梟示及剝去右手者已數千人所獲猱
賊男婦分賞在事有功者亦數千人准予安插竝
暫准投誠者亦萬餘人其餘生擒賊首賊目竝應

質審要犯家口現已數百人押解到省收監發審
所未獲大小頭目共不滿十人臣逐一開明嚴檄
擒拏即藏匿川界亦無所逃遁至威寧所屬阿底
土目捕兇等前經從逆明肆反覆續雖悔罪投營
隨軍效力非出本心此數百强獠難以姑息臣已
密示哈元生於回師之日盡數擒拏梟首沿途懸
示以除後患以警羣夷再江外川蠻有素不安分
應加懲創者俟提臣黃廷桂指定酌行亦不難清

楚是此一大舉轉可謀永寧福倚禍來誠如

聖明洞鑒而川滇黔三省漢夷之幸也現在軍務將竣
東川一路土兵業檄撤回官兵酌留三千名儘足
佈置烏蒙一路土兵亦應檄撤回官兵七千名
彈壓搜捕俱可敷用至於招徠建置營汛關隘諸
事臣已一面料理穀種牛力俱已預備現自外來
住牧墾田者已七八百戶再兩三月即皆有頭緒
除將調遣攻勦恢復完竣情形應詳叙

題報聽部察核外所有逆首全獲各路蕩平緣由合

再奏

聞伏乞

聖主睿鑒施行臣謹

奏

欣悅覽焉

同日又

奏爲委替總統嚴勦賊蠻事竊以廣西思明土府所

屬之鄧橫寨強暴恣橫積惡多年通計不過一百九十餘戶丁壯不滿千人聚集兇徒專事刦殺左有雷蓬右有那練暗爲黨羽互相勾結密竹層柵陽當外衛深濠險坎陰設內坑築土如城建臺安礮鎗箭能出不能入兵役敢近不敢前欲興問罪之師則懇誠悔罪及追逞兇之犯則委卸他辭凡屬各員多因循而諱盜遂爾成習致文過以養姦臣前有訪聞曾經屢

奏及奉

恩命兼制粵省復確查密訪情事無虛隨札致撫提二
臣并密行藩臬及文武各員公同查議及接撫臣
金鉷札稱歷委文武各員親往查勘實屬順民具
有不敢爲非不敢藏匿器械甘結并取具地方官
印甘各結等語而司道府廳并將弁等官據各詳
稟俱代稱恭順同口一辭所有刦殺各案皆置之
不問臣亦姑置之迨後再行確查鄧橫賊蠻不但

竝不悛改復敢明肆刦殺該文武知不可諱始詳
報請勦而提臣張漣以爲必不可縱已先委思恩
協副將尚清統兵進勦乃尚清毫無智謀不審形
勢於雍正八年八月初二日一到鄧橫即冒昧進
攻損兵挫威首先失利臣經嚴飭切責并詳示機
宜而尚清一誤再誤終於不振隨復准提臣張漣
調委左江鎮齊元輔親往調度并詳切札囑不謂
該鎮庸懦更甚日事遷延視賊黨爲腹心以招安

爲長策不能殺賊每爲賊愚不過數百賊已先傷
數百兵仍不知悔悟屢墮計中臣前後檄飭指示
頗詳而一無領會惟望投降似此劣鎮終何能濟
事臣於新提臣張應宗赴任時詳告情形密囑料
理計已到任隨於雍正九年正月十二日飛調右
江鎮蔡成貴星往並通檄軍前以鄧橫一寨自出
師以來已經半載提數千官兵勦數百蠻賊即不
能搗巢犁穴亦何難絕食斷援是縱出下策亦可

收全功乃遲延至今損兵已多殺賊何在爲總統者不知忿恨不識羞慚攻勦之策一籌莫展其有往來賊寨者不問餽送賊寨者不問帳外吶喊者不問營盤偷挖者不問甚至有營內士兵鳴鑼暗號約賊殺兵者亦不問以致三五成羣出寨窺探不能擒殺數十結隊出寨猖狂不能勦捕明知賊乘夜必來並不設伏而專藉土勇明知賊暗鎗屢中並不防備致日傷兵丁賊不出寨轉能殺兵賊

既出寨尚不能殺賊伎倆止此謀勇安在况屢示
機宜頻加策勵利害勝負分晰詳明不謂血氣全
無肺肝如見直至此日仍望投誠且稱託名招安
實欲借以擒殺以堂堂官軍不能用正不能用奇
而欲誑誘殺降無論智出賊人下早爲賊覷破計
必不成即便計成亦非男子事而損威失信所關
尤鉅又不止爲鄧橫本部院早知左江鎮庸懦無
能不堪任大事特以寨小兵多猶不難勾當且因

其力勦不克退而求叅故復嚴切檄飭許令自新
乃據來稟仍毫無定算又復歷月踰時而確探軍
情但聞今日誘撫明日詐降朝見武生暮商賊黨
旁觀者皆知爲左計當局者猶秘爲密謀以致軍
氣日頽賊志愈肆似此心膽掃蕩無期倘復姑容
邊疆何賴人或曲爲該鎮解本部院殊無以自解
也除飛檄左江鎮立速回任聽候叅處外合行專
委右江鎮即便於所屬轄選帶將弁并酌派漢土

兵丁星赴鄧橫軍前總統一切軍務須先絕賊黨
援斷賊糧路敢有私通私餽者審明某寨即先將
某寨屠滅毋得姑息亦毋得牽累并明白曉諭附
近各寨及各路土兵不許於近賊寨處所出入行
走以防遞信倘有故違初犯者插耳遊營再犯者
梟首示衆其軍中號令有明有暗陣前金鼓有緩
有催務使通知或令各記犯者皆依軍法其將弁
土司有畏縮觀望不齊心努力者立即據實揭報

以憑嚴究其鼓勇抒謀誓期滅賊之將弁土司奮
不顧身爭先殺賊之漢土兵練立即獎賞并明晰
呈報至於攻擊擒制不外審測變疑但知活法都
是先機矧此么麼有何轉幻惟該鎮審度大勢運
用一心毋撼於煩言毋膠乎成見即本部院從前
屢檄須善爲體會竝不必拘泥總期滅此朝食勿
使更留茲孽庶少振軍威用伸

國憲立撲蠻馘以重邊防在本部院所慮實不爲小

而爲大不在近而在遠以全粵兵力不能除一鄧
橫束手甘心此復可忝居軍民上膺封疆寄耶言
不盡意其熟籌速勅施行等因通飭文武并咨撫
提去訖該臣看得廣西一省盜賊殊多而諱匿不
少大吏粉飾寧靖有司瞻顧考成上下相朦積習
已久如鄧橫一寨特尤甚者耳惟調任提臣張溥
立意清除不避嫌怨次則總兵蔡成貴努力急公
然張溥微覺褊急蔡成貴過於執拘每不理於衆

口謗言日至而撫臣金鉉尤不以爲然臣每接札
稟委婉調停緣是未露形跡向使彼此和衷文武
協力鄧橫小醜亦何難立除臣故於咨行內每痛
切言之而於司道將弁尤日益嚴厲在撫臣金鉉
雖有自是護短之病然能諒臣心曾不以爲怪新
提臣張應宗頗能解事亦能和好料賊情盜案嗣
後轉可商辦得以清釐也至於左江鎮齊元輔以
所轄地方平日既已因循臨事仍然委靡不獨庸

懦亦且油滑實不稱總兵之任

臣當另疏糾叅候

旨遵行其所遺員缺關係緊要查三省副將內現無可

勝總兵之人懇祈

聖恩速揀賢能補授或將蔡成貴即調左江以專責成
將右江鎮缺另揀精壯強幹之員補授庶人地相
宜各有裨益再廣西副叅遊擊內尚有應叅之員
而雲貴兩省出缺亦甚多更祈

聖恩將可任副叅遊擊之員揀選十數人

命往雲南令臣預先委用酌量題補則要缺不致懸曠

臣愈得資指臂之力矣合併陳明伏乞

聖主睿鑒

訓示施行臣謹

奏

覽另有旨諭部

同日又

奏爲籌酌黔省養廉請

旨遵行事竊惟

聖主優恤臣下實至渥而極周大吏因地權宜應量入
以爲出即宣勞無異而不可不分繁簡爲低昂縱
品秩相同而不得不別新舊爲增損定額必給以
足數折扣不宜教職本近於鄉邦議給殊過雜職
雖應量給因數少而且俟將來試用難定人員待
歲終而統歸公用此不得不通盤合算較多論寡
者也臣查得貴州一省賦稅本屬無多故羨餘爲

數甚少雍正三年經前署撫臣石禮哈將額征火
耗秋糧耗暨官莊學租各米折價以及各屬稅羨
並府廳州縣等官名下俸銀共銀五萬九千二百
兩零奏請歸公自巡撫學政以至司道府廳州縣
等官分給養廉銀五萬二千三百兩留支一切公
費銀四千八百餘兩存銀二千零九十兩以充不
時需用之費在案但地丁糧米耗羨係有常額猶
不致缺少稅羨一項盈縮不常不能以一時查出

之數遂爲定額是以當石禮哈任內本年即缺銀九千一百六十餘兩不得已議將各官養廉九扣給發尚有不止九扣者又如官莊租米歷有支給孤貧賑濟寒生及囚犯解審口糧等項原不能盡行變價其各官俸銀遇有陞遷缺罰即應除歸正項亦不能槩算克公是此二項約又缺銀二千餘兩再永寧一縣已歸川省應除去稅羨銀三千六百九十餘兩更加以由川割歸之遵義一府暨所

屬之正安等五州縣由楚割歸之開泰等五縣又新設之南籠一府永豐一州除將本地耗羨即勻給各官養廉外尚少三千餘兩在從前公費石禮哈原奏定四千八百餘兩之外尚有必須公費各項未經奏明蓋因彼時尚有普安縣屬濫木廠水碾稅羨數千兩可以支墊雍正五年經前撫臣何世璽將此項奏請歸公統計不敷數目每年實共缺銀二萬餘兩今又加新闢苗疆現在

題准設立道員並同知通判縣丞等官俱應給以養廉約共需銀六千二百兩又緊要苗疆並衝繁險難各缺亦應酌增又約需銀五千七百兩再新添必需公費各項又約需銀六千餘兩以上三項共又需銀一萬八千餘兩並無別項羨餘可以籌酌惟有礦廠一項每年約可獲餘息五萬餘兩請將此項給與黔省以便補足石禮哈原議缺少之二萬餘兩並新添苗疆各員及衝繁險難各員之養

廉一萬一千九百兩又各管廠官役費用工食約計五千餘兩又新添必需公費各項之六千餘兩四項約共需銀四萬三千餘兩除各項支給餘銀按年扣算造冊報部留作收買餘鉛工本如有節省銀兩以充新闢苗疆犒賞之需如此量入爲出庶幾經久可行前臣過黔時撫臣張廣泗詢商此事臣囑伊再同司道詳細妥籌續知其所奏并議及教職在各省從無此例且伊等俱在本省又無

地方應辦之事即有差遺亦可於公費內酌給盤
纏原不必議及養廉者臣已切札相責張廣泗深
自愧悔而臣在黔面議諸事於此件未曾分別說
明亦屬疎畧今詳細籌酌分其新舊別其繁簡辦
其難易擬以實數發給不令九扣八扣其餘雜職
如經歷照磨司獄吏目長官司吏目典史巡檢等
黔省共七十七員原應議給然又約需五千餘兩
俟各項盈餘辦有成數再行

奏明議給又發往試用人員數之多少不能預定時
之久暫亦難預期况內有在省學習者應止給以
薪水之需倘遇差遣應量給以盤費此應開入公
費項下不應入養廉冊中臣統計養廉共需銀七
萬一千兩倘蒙

聖恩俞允以運售餘鉛獲息補足原缺及新添各員養
廉俱照新定之額頒發永爲定例則難易均平大
小各得而新設之員亦更知踴躍凡沐

恩施之隆益凜冰淵之操矣爲此繕摺具

奏伏乞

聖主睿鑒施行

臣謹

奏

卿料理自然妥協照所議行

雍正九年四月初九日雲貴廣西總督

臣鄂爾泰

謹

奏爲恭謝

聖恩事雍正九年二月初九日臣齋摺家奴蒙

恩賞齋回

御賜抵漠臣隨郊迎至署恭設香案望

闕叩頭謝

恩祇領訖跪捧摺扣敬詢

起居備聞

聖躬康強精神暢悅又聞

聖駕親行祈穀日瑞雪繽紛氣象和藹並前數日俱降

微雪預兆豐亨

臣踴躍忻忭莫可名言欽惟我

皇上敬

天勤民眷注不遺萬里而

至誠妙應昭賜先自京畿據來滇人員及臣家奴口述

自出京直至河南俱得大雪農民慶幸湖廣貴州

豆麥菜子俱盛而雲南全省冬雪春雨遠近霑足

二月內蠶豆上市三月內大麥菜子登場現在小

麥收割過半而稻秧已甚青葱

臣親歷郊外見田

家男婦翻泥放水行將栽插各有喜色謂又是豐年此

天心之仁愛實

聖心之感通慶幸無似倣惕彌深誠恐稍自乖戾不能爲承受地致累茲蚩氓耳爲此繕摺恭謝

聖恩伏乞

聖主睿鑒

臣謹

奏

覽卿奏謝矣期共勉之

同日又

奏爲奏

聞事竊照古州地方自勦平擺調方勝等寨隨經摺

奏在案嗣後通查各路如八寨丹江清水江諸葛營

等處氣象殷繁人情和樂商賈往來已如內地惟

定旦來牛二處原係苗外生苗因收附未久兼未

經嚴勦故附近各寨習染未除仍每有伏草傷人

偷牛盜馬等事又滾踪一處地勢險窄巢穴堅固
重重排柵扼要紆折且鎗礮齊備瞭樓高三五層
不等屢示招徠不肯受撫是滾踪不除定旦來牛
不懲恐苗衆效尤終難圖寧帖隨經臣嚴飭鎮將
密示緩急期在必勦毋許支飾前據總兵官蘇大
有派遣官兵進勦滾踪屢攻難破互有損傷時因
烏蒙有事曾囑令少待續據報蘇大有病故臣恐
苗賊乘機勾結必逞兇頑又或以兵力勢難並舉

必懈抵防遂一面委副將董芳署理古州鎮務撥兵速勦一面差本標千總李枝連齎臣存餘銀四千五百兩星赴古州宣傳似此賞需只管動支公項奏聞何必用此存餘銀兩

聖恩分賞兩省官兵以示鼓勵並令親看攻勦情形回報李枝連既到於十二月十九日密傳臣令各令協力齊攻黔副將趙文英帶領守備侯弘道等由左路粵副將潘紹周帶領都司鄧文選等由右路又派遣官兵分兩路堵截俱於四更時分前進每

路各有兇苗數百幫助滾踪以襲我兵之後被埋
伏官兵四面齊起分追截殺賊皆奔潰趙文英率
領官兵連克左路險關數道乘勢大進直搗滾踪
賊巢潘紹周帶領官兵翻山越箐連克右路險關
數道從滾踪後山直上攻打賊巢左右兩路相隔
十有餘里頑苗亦分兩路拒敵於是各領官兵併
力攻打至辰時會合直至未刻備弁兵丁爭先鼓
勇兩下夾攻遂破大寨鎗礮打死頑苗甚多帶傷

者無算當將賊寨巢穴焚搗一空日暮回營隨於
次日有苗衆投誠願繳鎗械懇請招安該副將等
因暫緩搜勦據差往千總李枝連回報并董芳趙
丈英潘紹周各詳報前來又於正二月內節據副
將卜萬年等報稱來牛定旦等寨各頭人陸續到
營呈繳鎗械造報戶口情願納糧當差永爲良民
等情臣查滾踪苗衆狡悍異常又非定旦來牛比
雖此番懲創已震軍威然家口預藏餘孽潛匿所

繳鎗械又復無多若驟准投誠終不能實心內向
況時值東作或頑苗恐誤春耕故爲緩計亦未可
料隨經嚴檄董芳等務將滾踪惡類盡力搜擒毋
任漏網然後將來牛定旦各頑寨相其誠僞次第
清除毋得率混去後嗣據董芳報已派遣永寧營
叅將施善元總統官兵會同趙文英進勦滾踪於
三月初一日抵賊巢右嶺初二日移營左嶺既抵
滾踪隨有逃避苗衆暨附近滾踪之高烏邦受等

各寨苗人跪接哀求情詞迫切該將等未忍加誅
茲於三月十四日有滾踪苗八十餘名各寨苗四
十餘名齊赴古州鎮衙門悔罪乞降納糧繳械咸
稱願予自新永作良民共繳鎗刀三百餘件未到
者仍令續繳職細詢軍前各員俱稱實係輸誠並
非飾說是以准其安撫其定旦一帶有平字遮擺
等一十九寨苗頭六十餘人齊集定旦營後共合
大款重申誓約願永作良民並保固來牛以至諸

葛營道路其來牛一帶沿江各苗皆已抒誠向化
至兩江上下各寨苗民稍有頑梗者盡知悔罪從
前觀望者皆懇當差目下光景實屬寧謐可以指
日撤兵奉諭料理殊易完結等語臣查古州等處
實千百年化外之區疆域二千里地險苗強料理
原屬不易即成敗遲速固皆可以情寬惟是治苗
之道首貴乎信信之爲義仁勇資焉故威不立則
惠不從勦不嚴則撫不定殺活皆以誠告力即可

以服心籠絡全以術行智亦不能終事凡此大要人所共知如果實心實力實勦實撫絕去欺朦一無粉飾則事或不舉而舉必有成事或不成而成必可久顧或意在邀功抑幸免過不欲徹底澄清因而藉端捏混是不終日之計何有十年之籌不信之至必至於負

國尤無論身名矣是以臣於黔省料理苗疆諸文武日益嚴切瑣瑣諄諄即於撫臣張廣泗亦竝不敢

稍有寬假之辭實自勉願共勉也今古州大局雖
據報平靜零星數寨自不難料理然功戒垂成事
防既定是否確實猶難深信張廣泗現擬親往古
州再行查勘臣復面囑韓勲札囑董芳並切諭諸
將務將善後事宜熟籌妥辦不得少有支飾並將
新擬設營添兵各件會議速詳以憑酌定具

題請

旨外所有據報勦撫滾踪各處情形合先奏

聞伏乞

聖主睿鑒臣謹

奏

覽

同日又

奏爲奏

聞事竊以烏猱叛亂蔓引鈎連庸懦震搖民夷惶惑一時情形實有猝難撲滅之勢迨韓勲一戰而大挫

賊鋒哈元生再捷而已寒賊膽恢復烏郡而賊盡
狂奔收克大闕而賊皆逃匿東川官兵會合於魯
甸而賊無可藏身四川官兵會合於永善而賊難
以托足且涼山鼠壘盡搗各處窩巢牛欄金沙遍
搜二江內外不獨賊子祿萬福賊弟祿鼎新白迫
阿得等皆已擒縛囚解並烏蒙倡逆之兇目庚沮
西戈補卧切黑窩龍山甲甲高魯維業等魯甸倡
逆之兇目段良伯鼠壽長段璠李六斤奔苴等鎮

雄倡逆之兇目刷刀法漏者約等阿底附逆之兇
目黑寡搆雄等東川發難之兇目祿良珍祿良臣
祿良宰祿天錫祿君錫等川界搶廠之兇目祿良
貴祿良相等以及各路大小頭目無不或斬或擒
殆無噍類計前後擒拏解省之逆目要犯共四百
七十名逆犯眷屬共一千餘名口尚有已獲未解
者應俟解審招詳到日一併親審具

題此外未獲逆犯尚有四五人現在四路嚴拏所有

三省陣亡帶傷及奮勇官兵現飭分晰查造恭候
奉到

恩旨送部查核臣已於正月後陸續將雲貴土兵通檄
全撤烏蒙酌留官兵五千四百名東川酌留官兵
一千五百名暫備彈壓搜緝之用其餘官兵亦盡
行撤回四川漢土官兵并咨提臣黃廷桂僅於江
外要隘酌留堵緝餘盡撤回其營制兵數田土城
池應如何添設開建及一切善後事宜容臣慎重

詳籌分疏請

旨仍一面辦理不敢延誤業於三月二十五日恭疏

題報在案續據各員稟報拏獲東川逆目七里阿虐
竝賊眷五名口烏蒙逆目切黑蘇甲竝賊父母妻
子兄弟十八名口又拏獲烏蒙要犯阿慮等六名
魯甸要犯者捕等十六名東川要犯戈則阿各等
五十三名所有要犯眷屬俱已解省一併發審此
外未獲止有烏蒙逆目擦拉蔑所大木那鎮雄頭

目施額東川女頭目安氏業經嚴檄四路查拏總
之凡屬頭目俱應剪除斷難令一名漏網即罪不
當殺亦必須遷徙庶既盡根株斯可絕萌蘖況此
番反覆備極猖狂若非仰賴我

皇上精誠惕厲上格

天心乘勢迎機皆如默助縱以哈元生韓勲之效忠將備
弁兵之用命求如此速捷無論諸文武不敢料百
千萬人皆知有不能臣實深感激倍切儆省倘復

以事已大定狃於俗論稍存姑息不爲邊方百年計則辜負

聖恩無異於劉起元官祿并何異於祿鼎坤故自始事至今或謂過於嚴急或謂近於殘刻臣皆不遑恤鬼神鑒察惟期勿欺衮影已耳所有續報情由合再奏

聞伏乞

聖主睿鑒再現解省審擬之逆首要犯及賊黨賊眷計

一千餘名罪應凌遲斬絞充發遷徙不等若必待具

題後候部議覆奉

旨准文到日然後發落既恐賊多病斃不獲明正典刑且日久事畢羣情漸忘亦無以快人心而震苗獠可否仰邀

聖鑒准臣一面具

題一面發落合併請

旨恭候

批示遵行臣謹

奏

有旨諭部矣

同日又

奏爲請

旨事竊照滇省新設鎮營調撥別營兵丁補額因其安

土重遷諸多需費屢蒙

皇上隆恩賞給搬家之資俱係動鹽餘銀兩查明大口
小口程途遠近分別給賞在案續因普洱府添設
新鎮額兵二千四百名內除原收普威營兵一千
四百名及新募補額外餘係調撥臣標兵一百名
提標及開化鎮標兵各一百名曲尋鎮廣羅協兵
各五十名元江協兵二百名今據普洱鎮總兵官
邱名揚詳稱此六百名兵俱有家口在各本標營
其中或父母年老家無次丁或家口衆多乏人養

瞻各兵無力搬移未免分心兩地且景蒙營原撥
普威營兵二百名時因鎮威車茶江壩等處屢有
軍務家口尚在景蒙地方今又改歸新鎮亦應令
其搬移援例詳請照給銀米前來相應仰懇

聖恩一例賞給路費俾得立業成家更可安心用命再
黔省撥往古州清江等鎮協營兵丁先經臣具摺
請給搬移之費荷蒙

硃批俞允未准部文行知又滇省烏蒙一鎮除舊額兵

應補外現議增設一營改設一協增兵二千五百
名臣已招募足數乘官兵尚未全撤即應新舊相
攙陸續撥往所有搬移家口之費亦應預先宣示
皇仁俾各知曉庶所撥兵丁倍加踴躍而願往者益衆
矣理合一併請

旨伏乞

聖主睿鑒

敕部知照施行臣謹

奏

此奏朕嘉是覽之凡有此等應施恩之事皆當密奏以聞朕自斟酌而行也另有旨諭該部頒發

雍正九年五月二十六日雲貴廣西總督臣鄂爾泰謹

奏爲恭謝

聖恩事雍正九年四月十一日臣齋摺家奴齋回

欽賜臣

御書單條一幅對聯一副新織花樣絲布四疋抵滇臣

隨郊迎至署恭設香案望

闕叩頭謝

恩祇領訖臣盟手莊誦注目諦觀曷勝敬仰曷勝忻忭

恭惟我

皇上

天縱多能

日新富有

萬幾餘暇舞龍鳳於毫端

十指轉旋散珠璣於紙上斯固

聖藻之超前軼後而尤臣心之遂願移情夢寐瞻依捧宸翰之輝煌如傍

玉皇之香案山川間隔睹墨花之璀璨恍覲

慈父於龍墀仗尺素之雲煙爲近

光之日月

頌來萬里不違咫尺於

天顏傳去千秋永
貽奕葉之盛事
載吟

睿製見天地之同流
敬繹

王言識動植之咸
若遮橋柳線絲
絲剪出春風夾道榆

陰樹樹苞含膏雨
翻空麥浪仰窺

帝心之眷注
惟在鑿井耕田
濺水池珠伏思

聖學之高深
早徹鳶飛魚躍
隔林鶯舌聲唱
太平之歌

拂水柳花點成
熙皞之象
樂兆民於海晏
豈止

輦路塵清示庶職
以天和常見

御園景滿寶此鸞翔鴻戲更重於琬琰珪璧之珍聆
茲大呂黃鍾何殊於夏玉敲金之奏懸諸堂上如
傳闕里之書

賜出天邊更得金閭之芋荷蒙

聖主以錦字當華袞之榮矢願微臣以尺布佐九州之
被謹此繕摺恭謝

聖恩伏乞

聖主睿鑒臣謹

奏

覽卿奏謝矣

同日又

奏爲鄧橫已靖蠻賊盡屠恭報情形仰祈

睿鑒事竊照廣西太平府屬之鄧橫寨蠻賊積惡猖狂
逞兇肆橫左江鎮已革總兵齊元輔不能勦捕惟
事因循致賊勢愈張軍威不振經臣改委調任右
江鎮總兵官蔡成貴詳悉指示令往料理業經

奏明在案續據軍前稟報並叅閱圖形計該寨共分三甲賊衆本甚兇橫地勢原屬險阻加以駐兵半載既損聲威玩寇多時反驅準備以致鄰寨畏勢亦暗許勾連土兵相機更明行觀望因而壕塘之淺窄者復得開挖寬深牆垣之低薄者復得砌築堅厚且牆壕層間路徑紆盤兼有地道數寨相通而又環築礮臺密開鎗眼賊在內有以藏身兵在外無從駐足故鎗礮不能入入亦不能傷而賊則

處暗擊明半無虛發是此時之進取實較從前爲
倍難該鎮蔡成貴自二月十四日抵軍營後遵照
臣言先將攙雜之土兵盡行遣回復將營盤漸次
前移逼近賊寨得步步進步即搶築礮臺劄營駐守
示以圍困之意一面捲土砍竹置備火具爲填塘
攻寨計蔡成貴初次督勦雖奪取一二礮臺賊已
驚恐亦互有傷亡臣據稟報恐或欲圖萬全將復
濡滯又以時已入夏恐雨水連綿瘴癘漸發或疫

作氣餒更何能剋期竣事因激以榮辱利害之語
示以必勝不敗之機詳札切囑嚴檄飛催隨復發
三等紀功牌並醫創治疫等藥專差持諭速往督
進茲於五月二十二日據該差回滇並報捷千總
王廷彩稟稱自三月二十日進勦起兵分中左右
三路以敵賊之四六九三甲無分晝夜不避險難
伺隙即攻乘間即奪計經一月始直逼賊巢凡寨
外各要隘皆爲我兵占踞四月二十四日叅將劉

成遊擊王欽袁士傑等督率漢土兵丁斬柵壞垣
奮勇殺入將九甲全平二十八日副將尚清遊擊
陳典等先於天未明時遣用土練暗進四甲埋伏
至二更時分令各站牆兵丁沿寨舉火乘勢攻進
亦將四甲全平所有賊衆除斬殺燒死外餘皆竄
入六甲合夥死拒因即於四九兩甲各暫劄營會
合各官土兵并原攻六甲之叅將周儀遊擊羅王
秀劉欽等併力圍攻至五月初四日已將六甲賊

寨占奪大半賊衆危急奔赴遊擊袁士傑守備俞
大勇營盤求撫當即拘留看守復據投出之賊首
馮韋高帶領賊黨十二人進寨殺取首惡首級呈
獻有蠻賊百餘人知必不准撫又突出砍柵意在
衝圍逃竄被官土兵亂鎗密桿盡數殺死各割取
首級並獲烏鎗長桿籐牌腰刀挑刀大旗等件繳
送營盤隨復督兵攻進生擒一百餘賊皆綁赴營
門立即梟首致祭旂纛並陣亡官兵其賊蠻男婦

除傷斃外尚餘六百餘名口俱解赴省城候審發
落初六日俱經全平各寨壕塘現在督填寨外密
竹現已盡砍該寨惡類並無一漏網等語合諸鎮
將及軍前道府各稟報無異臣查鄧橫三甲雖強
賊不滿千人而巢穴險固器械堅利即論礮臺竟
多至百餘座黔苗滇猺從無此兇悍是非獨庸懦
如齊元輔輩原不能剋期勦滅即全粵文武見臣
必欲勦滅不但有難詞且將作笑柄意謂事必不

能不如將就及見臣嚴行通飭委蔡成貴前往尤
不以爲然殊不知以全省兵力不能制一鄧橫任
其頑抗歷數十年則獍狼猙獍尚何所忌憚是以
臣於此舉多有激烈之言從無和遜之意謂置之
死地而後生此外決無勝算非止爲鄧橫實爲全
粵計也今仰賴

聖天子仁威終於屠滅不遺根株將通省震動各知警
懼不敢稍有不法事則恩生於害所全實多雖奮

勇弁丁傷亡可憫然死於陣與死於家孰幸孰不
幸臣終不敢稍存鄙見視甲士如婦人不責以大
義忍姑息以相輕也除俟總兵蔡成貴呈報進剿
詳細并奮勇傷亡官兵查造冊報到日另疏
題報外所有鄧橫已靖蠻賊盡屠情形合先奏

聞伏乞

聖主睿鑒臣謹

奏

題到有旨卿前奏云楊天縱乞休尚未見奏到朕意欲將哈元生調黔用蔡成貴爲滇省提督卿以爲何如若與朕意相同其右江鎮員缺孰可勝任可奏來一併發旨

同日又

奏爲恭報三省豆麥收成分數仰祈

睿鑒事竊照雲南省本年二月雨水微稀雖去冬大雪豆麥苗甚盛誠恐過時不雨粒實不堅臣竊深省

惕至三月望日甘霖大沛遠近均霑嗣後間晴間
雨甚屬調和貴州省春雨無缺獲刈較晚是以兩
省各屬所種豆麥俱獲豐收今行據雲南布政使
葛森詳稱除石屏甯我騰越師宗元江新平景東
等府州縣併攸樂地方向不產豆麥烏蒙鎮雄會
澤永善等四州縣因兵燹甫定現在招集人民耕
種收成分數未據冊報外昆明呈貢晉寧宜良嵩
明昆陽霑益蒙自河西阿迷鎮南廣通定遠保山

江川永平楚雄羅平宣威等十九州縣豆麥收成
俱有十分十二分不等羅次南寧建水普洱新興
文山河陽趙州南安浪穹賓川太和陸涼彌勒尋
甸平彝安寧鎮沅恩樂雲龍永北雲南鶴慶麗江
姚州元謀大姚順寧寧州馬龍等三十府州縣豆
收八分九分不等麥收九分十分不等易門富民
廣南蒙化劍川通海雲州祿豐廣西鄧川和曲祿
勸路南威遠等十四府州縣豆收七分八分不等

麥收八分九分不等據貴州布政使常安詳報豆
麥雜糧等項現在收獲通查各屬內定番廣順貴
定龍里安順普定鎮寧清鎮桐梓印江婺川思州
黎平開泰永從平遠等十六府州縣俱係十分收
成貴陽貴筑永寧安平南籠普安州永豐安南甕
安湄潭都勻府都勻縣鎮遠府鎮遠縣清平施秉
思南安化石阡龍泉玉屏青溪銅仁府銅仁縣天
柱錦屏大定黔西威寧遵義府遵義縣仁懷等三

十二府州縣俱有九分收成開州修文普安縣正
安綏陽平越府平越縣黃平餘慶獨山麻哈畢節
等十二府州縣俱有八分收成據廣西布政使元
展成呈報除恭城賀縣修仁昭平容縣岑溪懷集
橫州永淳上思懷遠賓州來賓上林河池東蘭等
州縣向不產豆麥雜糧天河一縣豆麥收成頗遲
分數難以預定外興安富川藤縣平南武宣左州
馬平思恩等八州縣大小二麥收成俱有十分荔

浦蒼梧宣化融縣等四縣豆麥收成俱有十分臨
桂陽朔灌陽平樂隆安崇善養利雒容柳城羅城
象州宜山荔波奉議都康等十五州縣二麥收成
有八九分永寧永福義寧北流桂平西林等六州
縣豆麥收成有八九分靈川貴縣永康遷江等四
州縣麥收俱有七分永安州豆與大小麥收成九
十分蕎麥收成八分全州小麥收成八分豆子蕎
麥收成七分鬱林興業新寧等三州縣豆子雜糧

收成有七八分博白陸川二縣并泗城府麥糧鮮
有栽種豆收有七八分鎮安府西隆州歸順土州
蕎麥麪麥收成七八分武緣縣蕎麥收成六七分
向武土州麥收九十分上映土州小鎮安土州蕎
麥收成九分小麥收成七分各等情前來合臣察
訪無異相應據實分晰

奏報再雲南省自入夏以來時雨屢降遠近霑足而
芒種日大雨夏至日甚晴據農民稱幸以爲又係

豐年現在高低田畝栽插已完早秧出水逾尺青
葱可愛夏蕎雜豆亦甚茂盛如得仰邀

天恩此後晴雨但不至過甚則今歲秋成又可預卜大有

合併奏

聞伏乞

聖主睿鑒臣謹

奏

以手加額覽之京師目今甚旱實知皆朕一人之咎此

中不得已召致之情惟祈

上天鑒諒耳亦不勝批諭

同日又

奏爲欽遵請

旨事竊臣自雍正三年十二月初一日

陛辭赴任後遠違

天顏已歷六載孺慕私衷日久彌切昨歲恭請

陛見荷蒙

慈鑒准於今歲八月初旬內自滇起程於

萬壽令節前抵京踴躍忻幸莫可言喻續於十一月二十八日摺內陳明俟烏蒙等處佈置停妥於今年八月初自滇起程緣由復蒙

硃批亦且不必拘定八月至臨期相機再行請旨欽此
欽遵臣查雲南之烏蒙東川早已平靖現甚安帖
其餘邊夷外域皆實心向化各享盈寧廣西鄧橫
蠻寨亦經屠滅淨盡根株而貴州之古州新疆凡

未歸生苗又復酌行勦撫悉入版圖縱有一二寨招擒殊易即接壤楚界之稿坪落塘數寨原非強賊現已懲創不日可以報竣此外三省別無大事其地方諸務三撫臣儘能料理可以放心乘此空閒往還不過數月計明年開印後即可回任亦並無曠誤臣謹擬於八月初四日自滇起程敬記

慈諭按程緩行至總督印務實關係重大臣於昨歲曾以三撫臣中沈廷正不能制金鉷較遠張廣泗雖

尚未能服衆似猶可以暫署等因附摺陳明續於
另摺內荷蒙

批示臨行時可具題以聞督印可傳諭張廣泗署之欽
此今臣起程有日臨行時自應將督印移交惟是
張廣泗現擬親赴古州會同韓勲等經理一切善
後事宜並黔楚苗界之三不管地方俟稿坪事定
亦須就近詳勘將移協安營增汛添兵等事酌商
定議以便

題請計日需時或難兼顧且臣衙門三省書吏三省
文卷例隨督印自滇移交甚屬繁重臣曾密商張
廣泗亦稱多有未便合併請

旨或將督印仍交張廣泗令伊赴滇署理或暫行收貯
令三撫臣各於本省暫代行總督事俟臣回任再
將事件移交統乞

聖主睿鑒

裁示遵行臣謹

奏

卿來京見朕不過暢我君臣一時之情耳而三省苗疆甫定尚需鎮靜彈壓善後事宜更資料理況朕萬壽廷臣亦皆不令行禮卿萬里往來匆忙一見更覺難以爲情朕當再加詳酌降旨至總督印務或令高其倬前來署理或令三撫分任處臨期亦有旨朕意於今冬或明春著令卿來今朝中尚少一贊襄機務之人朕正在籌畫大概并諭卿知可靜候朕旨而行八月之期不必也

同日又

奏爲覆

奏事竊照廣西布政使元展成前請以分發進士派
交各府知府學習一摺荷蒙

硃批與督撫商酌爲之若意見相同應請旨可具題來
欽此欽遵錄示到臣謹按欽奉

上諭以今科中式進士分派各省藩臬衙門令其學習
三年卽於所派省分試用補授者正以藩司衙門

爲一省錢糧之總漕司衙門爲一省刑名之總
漕但能用心學習三年必有一長於該進士大有
裨益即於該省分大有裨益也茲據元展成奏稱
通省政事雖出於藩司要皆總攬其綱領與州縣
官親民者有別且收放錢糧事有成規可無庸學
習再命盜案件例由州縣解府審詳到臬司衙門
已屬成讞即有供情未協亦仍駁回府其民間細
事非臬司逐一親理若令入藩臬署內學習又與

内幕相親亦恐滋弊是分派各省進士不如於知府衙門學習之爲親切等語臣查一應事件無非情理守正持平端視大吏故宣化爲藩不止司錢穀弼教爲臬不止司刑名此外省樞紐之地實觀政者之準的也若不令學習於藩臬轉令學習於知府是猶使觀水者舍江河而就溝渚其能識源流者幾何臣愚以爲分派學習除藩臬衙門外督撫糧鹽道衙門亦應酌派總在省會易於觀摩似

不必分派各府轉不能時常接見無以試驗其優劣也惟是有教斯有學有傳斯有習竝非止於陞堂片時令其侍立靜聽而即可望其知能或間發一案令其擬看或故作一問令其裁答或實指一事令其條陳或虛設一疑令其剖斷或差令查勘或委令督催或間論夷情或詳說地勢就其言動觀其才識指示是非改正錯謬如此三年庶學習進士或可半有成材至於學習署內恐與內幕相

親將來滋弊此事惟在本官即如書吏未嘗不在署內與内幕隔別原不得相通作弊不作弊亦豈限於署內署外各衙門二堂以外儀門以內但擇閒房二三間即可爲學習之所其日用薪水應酌量資給俾無窘迫庶益奮興臣現於分發雲南新進士九員內將一等次等者派往撫藩各衙門學習留又次等二員在臣衙門學習仍不時傳集合考其所學分別勤惰以示勸誡在各省各有不同

總期仰體

聖意造就人材並可不必題請通飭除知會撫臣金鉉
札覆布政使元展成廣西可否照行聽其再酌外
緣係錄示商酌事理合備陳愚見繕摺覆

奏是否有當伏乞

聖主睿鑒

批示施行臣謹

奏

是

同日又

奏爲續報勦撫生苗并收繳軍器事竊照古州之滾
踪寨頑苗恃險負固抗招經臣委令署古州鎮董
芳遣撥黔粵副將趙文英潘紹周帶領弁兵進勦
并歸誠苗衆繳械納糧各情形業經繕摺

奏明在案復查新疆地界寬濶二千里遠僻生苗未
經招撫者尚多即已受招撫之苗爲生苗牽制猶

懷疑貳者亦仍有數寨若不徹底清理稍有將就
終恐無以善後隨又切諭鎮將勒兵巡遊相機勦
撫去後續據稟報自滾踪徹師後凡從前觀望及
歸向未堅之寨各皆呈繳器械願納條糧誓爲良
民竝無異念惟有已有厄有路石格四寨尚未出
投更有邱車一寨恃強阻抗若不示懲無以服衆
業於四月初二日復委副將趙文英潘紹周叅將
施善元等領兵前往料理據沿途經過歸順各寨

皆踴躍慇懃効力恐後因各加獎慰以堅其志初六日兵抵高舊寨當據有已有厄有路三寨各苗免求鄰寨苗頭帶領來求收撫時並未准撫初七日進至邱車附近劄營而邱車寨苗已擂鼓舞刀準備拒敵該將等於初八日五鼓分兵三路進勦苗衆亦分路拒敵官兵併力奮攻連破關隘數道自辰至未苗衆大敗隨直搗巢穴踞地駐兵初九十等日復行搜捕十一日夜該寨餘孽於對山喊

叫饒命徹夜不止三十四等日有苗人阿羊赴
營稟訴山苗原不知

王法從前聽了苗頭阿桶的話勾結各寨不許繳械上
糧原是實事今官兵殺進來衆苗都知怕懼只求
寬限願盡數繳出刀鎗做好百姓等語復三次帶
領男婦老幼到營哀懇又據有已有厄有路石格
四寨苗人各負軍器投繳訴稱被脅附和實由阿
桶指使衆口同聲當著將阿桶細獻詢供不諱即

經臬首示衆尚不肯收撫仍議痛懲直至二十一日衆寨羣苗哀求情迫邱車軍器亦已繳齊始令合款諄詳開諭各皆傾心受撫誓作良民續又據附近已撫之鄙倍平宇歹擺等寨苗人背負刀鎗到營稟稱各家留得一兩件器械原為防備山苗今邱車寨既已勦除都做好百姓還要這器械何用所以盡數繳來等語隨各加獎賞一併收存計此次所收合赴鎮所繳烏鎗苗刀弩弓標子桿子

皮盔甲等項共二千一百零二件從此遠僻山苗
始知懷畏矣又據都勻協副將卜萬年等稟報革
招來牛等寨自經遵諭搜勦後俱求安插矢願歸
誠該將等暫准羈縻仍暗地訪察欲分別誠僞再
定勦撫而諸苗歸寨後各皆安心樂業所繳鎗刀
標弩共計六千五百六十九件其感恩悔罪之誠
即於此可信似無庸再勦者臣查邱車一寨强大
頗類滾踪有已諸苗反覆未如定旦示勦示撫宜

別寬嚴若使滾踪不滅邱車必不服有已等寨亦
不順猶之定旦不懲革招來牛等共一百三十餘
寨亦仍有觀望必不肯投從前張廣泗委辦古州
因惟示恩惠未加兵威而副將趙文英又極言恭
順深信不疑臣故預料該寨之必將蠢動而速調
粵兵及粵兵甫來而形跡已露一經嚴勦始復帖
然此相因之勢亦反還之機少有粉飾必至貽誤
前車之鑒固不敢仍蹈覆轍也今兩處續收鎗械

又共八千六百七十一件兇器既繳兇心自熄而
楚粵河道現已通行各處城垣現已完備論目前
大局粗可稱就緒惟通粵江路尚有滾塘一處當
水陸要區雖不頑抗亦不投撫若不制伏終有阻
礙臣已密囑董芳令廣西叅將施善元於撤兵回
營之便乘機辦理務期了當並札致撫臣張廣泗
仍將舊撫新撫遠近各寨詳細查勘再商同鎮將
等將一切善後事宜妥議定擬容臣斟酌覆核會

疏具

題請

旨遵行外所有續報勦撫生苗并收繳軍器緣由合再

奏

聞伏乞

聖主睿鑒臣謹

奏

覽奏知道了善後事宜卿自然料理妥協也

同日又

奏爲奏

聞事竊照南掌國夷目叭猛花等進

貢回滇臣委員照看起程並差目兵二名暨土把總
召猛比伴送回國嗣據普洱總兵官邱名揚知府
佟世廕等稟報該差等伴送夷目於八年十一月
二十四日至該國界內之戈奈地方有猛洒叭先
率領數百人於五十里外跪道迎接將

敕書安設龍亭供奉緬寺叭先復率領大小頭目人等
行三跪九叩頭禮敬謹護衛叭猛花隨寫緬文差
先目二人馳報該國王於十二月二十三日差回
猛洒恭請

敕書

御賜由猛喇上船沿途地方該國王皆差頭目敬謹迎
接至雍正九年正月十五日抵埧烏離南掌百餘
里該國王烏孫先遣大叭目四員帶領二千餘人

備金銀綵花龍船四十餘號設

龍亭香案親出五十里外跪迎至新造公館內供奉

敕書

御賜畢島孫行三跪九叩頭禮復齋戒三日始恭迎進

署行禮如初然後吟猛花敬捧

敕書跪授畢島孫跪接開讀畢又捧

御賜一一傳觀點交明白該國君民歡聲雷動舉手加

額齊稱自有南掌以來從未有此榮寵蒙

天朝聖主恩賜惟有世代頂戴其感激實出至誠留該
差等住二十日極其敬重於二月初六日該國王
遣目先教先喇二員並後生十一人齎捧謝

恩蒲葉泥金緬字表文一道隨經譯出情辭諄懇等語
稟報到後該目等抵省臣傳見面加勞慰據來目
稟稱國主感戴

天恩無可以報惟有一心歸誠世世子孫不敢忘

天朝大恩再銅鑄一對物雖不堪係祖代相傳之物國

主請獻

皇帝以表小臣誠心五年再貢時差目人等見此銅鐸
即如在本國一般外象牙雀尾籐席樹頭酒四種
係國主呈送總督以見感念求收留等語臣查所
稱銅鐸即係大銅鑼外夷草野意雖誠而物甚微
恐違體制既未便入本若令其帶回又非遠人之
意相應存貯俟隨便附

好

進其寄臣土物已經全收以示優禮除將蒲葉緬字

表文并譯出漢字副本另疏代

題外存貯銅鐸緣由合併聲明再莽國請貢一件臣
前奏摺內荷蒙

硃批極好之事此皆卿代朕宣猷之所致但總宜聽其
自然不必有意設法誘致蓋此等事乃國家榮幸之
實跡惟靜待

天恩非人力之所能者欽此臣查莽國土名阿瓦即緬國
西南之夷無有大於緬者因有外域整邁即八百

媳婦國衆亦至十萬舊隸緬屬後互相仇隙歷年
爭執整邁曾於七年冬差目納款情願歸誠據普
洱文武公稟欲求允許臣經嚴批不准以十可疑
駁去嗣後鎮府等密差查探始知整邁前曾誑緬
國以爲我國已投

天朝欲借聲威以示恐嚇故前此莽子未敢加兵因於
去歲十月先差大頭目莽古叮叭喇等赴車里一
以賀刀紹文承襲宣慰并以探聽整邁歸附虛實

適南掌夷使叭猛花等回國相遇於九龍江而守
備燕鳴春送夷使過江亦與莽古叮等相會問答
款洽之際復備悉整邁投順臣不允許緣由其慶
幸傾服愈出意外是以諄切懇囑至再至三若惟
恐弗准者此實出於自然臣初無招致之意續於
五月初十日據總兵邱名揚探報莽國發兵二萬
令國王之子同莽古叮統領問罪整邁現在相持
其所屬小國亦聽調幫兵等情臣隨密諭鎮將但

於內界巡防勿許過江驚擾勝負聽之仍行探報
是去訖料整邁之於莽必不能久持而莽國之於臣

亦必不敢失信遲早不可知歸附固可定也合併
覆

奏伏乞

聖主睿鑒臣謹

奏

總聽

上天慈佑

雍正九年八月初一日雲貴廣西總督臣鄂爾泰

謹

奏爲欽承

恩諭再摠愚忱事竊臣欽遵請

旨一摺於七月二十日接奉

硃批卿來京見朕不過暢我君臣一時之情耳而三省
苗疆甫定尚須鎮靜彈壓善後事宜更資料理況朕

萬壽廷臣亦皆不令行禮卿萬里往來匆忙一見更覺難以爲情朕當再加詳酌降旨至總督印務或令高其倬前來署理或令三撫分任處臨期亦有旨朕意於今冬或明春著令卿來今朝中尚少一贊襄機務之人朕正在籌畫大概并諭卿知可靜候朕旨而行八月之期不必也欽此臣跪誦之下如親覲天顏如親聆

天語激切瞻依莫可言喻而尋繹萬里往來匆忙一見

更覺難以爲情句熱血奔心復不禁淚下盈襟矣
伏念三省苗疆廣狹不一臣數年以來凜遵

聖訓已料理一十六處雖勦撫異施遲速各別然大率
多一番懲創斯增一分寧帖今大局甫定諸務須
籌安輯調停更非易事若不用猛力斷難圖成若
不具恒心終難善後此中緩急細體方知以臣薄
劣固猶期之數年後也况一切民事多未就緒如
疏濬江河挑築溝壩墾闢荒蕪焚烈山澤皆地方

之遠計尤邊省所急先臣雖竭蹶料理亦畧有規模獨因廢弛日久一時難以俱興猶未敢

題報凡此兵民要務皆臣所有志而未逮欲懇請

陛見既少慰私衷並敬領

訓示再馳回滇任盡心調劑以二三年爲期然後入侍

左右少效奔走此臣之至願亦臣之厚幸也茲蒙

恩諭再加詳酌或今冬明春著臣來京並委署分任之

處一併

降旨臣當欽遵靜候安心辦事斷不敢少有延挨亦不敢少有將就也爲此繕摺覆

奏伏乞

聖主睿鑒臣謹

奏

覽已命高其倬來滇矣到時卿自悉知其餘事件總俟卿來京面諭路上量力行走不可勉強奔馳過於勞碌必遵旨行

同日又

奏爲

皇威已靖苗氛

天象特昭瑞靄事竊據廣西布政使元展成等詳稱雍正九年五月二十九日卯時旭日初升祥雲捧護日旁有宛然山字結成不散綠色繽紛似芝似蓋山形靉靄爲阜爲陵儼舞鳳於丹山煙霞縹緲拱赤烏於碧落瑞靄絢緼歷卯辰巳三時之久遍府州

縣四屬之區文武兵民咸稱爲南寧未聞之上瑞
鄉村城市共慶爲西粵未睹之奇祥等情又據左
江鎮總兵官蔡成貴呈稱自剪滅鄧橫賊寨奉檄
撤兵於本年五月二十二日抵署即於二十九日
特見異瑞等情各到臣查粵西爲猛獍矜狼之
雜處惟多瘴雨蠻煙鄧橫爲兇惡獷悍之渠魁久
肆苗氛惡焰一朝屠滅頓開化日光天合省震驚
悉畏雷霆烽火下民之怨氣盡散撥霧披雲

上蒼之和氣旋施回春煥采故於戢弓橐矢之際特呈金
柯玉葉之奇童叟呼嵩歷三時而結字臣民額手
遍四屬而同觀感

北闕之動

天咸賴

一人有慶頌南山之成象羣祝

萬壽無疆除經撫臣具疏

題報外謹繕摺奏

聞伏乞

聖主睿鑒臣謹

奏

業已題到矣

同日又

奏爲覆

奏事雍正九年六月初十日大學士公馬爾賽大學

士張廷玉寄信內開雍正九年五月十五日奉

上諭聞廣西鄧橫苗寨憑仗險阻屢攻不克因思京師
冲天礮一種若用以攻擊苗寨似操必勝之技查冲
天礮大者重七八百斤小者重三百八十斤遠道運
送以小者爲便爾等可寄信詢問總督鄂爾泰若攻
取苗蠻地方須用此礮即具奏前來朕發礮二位並
選精熟礮手二人一同前往至於應送何省何處亦
令鄂爾泰酌量定奪倘攻取苗寨不必用此或此信
到日苗疆軍務已竣亦即據實奏聞欽此遵

旨寄信前來等因到臣臣捧讀之下感奮惶悚一時交
集敬念我

皇上萬幾宵旰無慮不周以鄧橫一賊寨而屢攻不克
猶致上厪

聖懷此天下兆姓之福亦臣等大吏之罪也因欽奉
上諭之前鄧橫已報捷音暫不須用故未

奏請查冲天大礮實攻擊之奇器果能熟悉礮規遠
近高下不差尺度則無堅不破亦何險可憑惟是

此種礮位俟未便留置外省且蠢爾苗蠻原無大
伎倆但將領少具勇謀鎗礮即可操必勝臣於各
苗蠻之役又製有西瓜炸礮火毒羣蜂礮並火箭
火磚等件用以攻寨亦頗便利前於烏蒙攻破涼
山木城近於鄧橫攻破四六九甲俱甚得其力三
百八十斤重冲天礮二位俟或有須用之處臣再
當請

旨頒發然仰賴

天威百蠻震疊惟願永遠更不須用此礮則邊疆幸甚

臣愚幸甚謹據實覆

奏伏乞

聖主睿鑒臣謹

奏

甚是

同日又

奏爲覆

奏事竊臣恭報鄧橫已靖情形一摺荷蒙

硃批題到有旨卿前奏云楊天縱乞休尚未見奏到朕意欲將哈元生調黔用蔡成貴爲滇省提督卿以爲何如若與朕意相同其右江鎮員缺孰可勝任可奏來一併發旨欽此查楊天縱原係能事提督獨以年近八十兩耳重聽考驗稽查恐不無錯漏是以臣

前經奏

聞擬令乞休續因軍務未竣須人料理故不得不暫緩

今已密札囑伊具本矣黔省苗疆關係緊要且楚粵邊界尚有應辦事如蒙

聖恩將哈元生調黔實可以有濟雲南提督員缺統轄九鎮方隅遼濶雖苗獮雜錯接壤外夷然地方寧靜營伍充實但得操守端謹可以服人訓練嚴勤可以馭衆之提臣即可以收實效而勿隳前功左江鎮總兵官蔡成貴耿介自持從無苟得操練約束不避嫌怨若補滇省提督亦可以勝任雖伊賦

性孤直多與人不和然臣能相規伊亦相信同省共事自可以相與有成也至左江鎮員缺當水陸要衝汛連交趾營接廣東雖鄧橫已除諸務猶須整頓現在三省副將內無可勝此任者查雲南永順鎮總兵官霍昇雖器局微小似非大材然操守謹飭不減蔡成貴練兵有法不讓哈元生且諸事留心俱可條理移調左江殊可以資彈壓其永順鎮遺缺查臣所屬副將內將來可用總兵者僅三

四人或尚須造就或尚少功勤或要地未可擅離
或擬留用要地現在俱未便陞補懇請

特簡補授或將山永協副將冶大雄補授庶邊防各有
能員臣亦得資指臂之用矣謹繕摺覆

奏伏乞

聖主睿鑒

採擇施行臣謹

奏

覽治大雄已有旨著署犇陵總兵矣軍前需用人員甚多各省要鎮多將就委用一時不得其人三省員缺卿只可酌量補調越銜不合例不必論也霍昇之缺可遞行擬員言之高其倬具奏請旨

同日又

奏爲蕎自天生蟲爲鳥食

天庥滋至

聖德靡涯事竊惟兵燹之後難冀豐盈螟螣爲災何能

驅捕雖曰種由誕降未聞新條發自陳根卽謂蝗不成殃未聞禽鳥能爲掃蕩查得烏蒙新改之昭通府自從大兵進勦屠滅逆猺之後人煙稀少田野荒蕪商賈不來米糧甚貴臣念地方新定一切佈置皆以食爲先憂心如焚恐難接濟計檄飭該鎮府各員所安插土著之殘黎招徠遠方之農賈凡歸業遠來者已不下數萬人雖令分寨給田各與資糧牛種督率耕種又檄發別郡之米減價平

糶更委專員買蕎種數百石於大關壩等處凡屬
隙地皆令犁種以資秋冬民食然私心熟慮亦止
期可免匱乏並不敢過望饒餘隨於六月初間再
委糧儲道黃士傑親赴昭通并歷東川令遍行查
勘督催料理續於七月初十後屢據各員稟稱昭
通府之稻田壩八仙海等處及魯甸各寨禾苗俱
極茂盛再各處蕎苗碩大異常早者七月盡即可
收割更可異者去年夷人種過蕎地本年並未犁

燒今悉從舊根長出新蕎花實繁茂與本年新種者無二東川府巧家等處亦然官弁漢夷懽呼慶幸謂從來所未見亦所未聞因名曰天生蕎又六月二十八日八仙海稻田壩等處禾苗忽生赤蟲長寸許無毛蠶食稻葉該鎮府等情急無措呼臣名虔禱詞語甚厲忽有烏鴉數千飛鳴捕啄一二日間噉食罄盡而鴉亦不見稻苗並無傷損轉益茂盛誠屬奇事定獲豐年等語臣接閱各稟初不

敢以爲信及密加查訪道路兵民皆互相傳說而
前所委員並糧儲道黃士傑亦適回省復經細問
所道更詳並稱睹此奇異商民踴躍米價已大減
且遍觀城郭鄉村不獨酒米鹽布上市充裕而一
切蔬菜俱全較從前尤勝其東川城工該府全用
石砌現有規模昭通城脚需用五面石已打就一
千五百餘丈現在催趲燒磚不日興工衙署營房
已蓋造及半俱無遲誤等情臣查昭通地土素稱

肥沃近省各府實皆有不如因向爲兇裸所據故
人視爲畏途今既洗除惡類將實以良民則但能
悉心調劑毋躁毋忽不三五年實可謀富庶況蔿
自天生誰來下種蟲爲鳥食不期其然粒我烝民
益信

帝德之無遠弗届殲茲蝨賊羣識

聖心之無物不孚雖

上天之仁愛憫此邊隅實

一人之精誠積於宵旰臣親逢嘉瑞睹兆姓而懽忻伏
念因施捫寸衷而凜慄除將一切事宜敬謹料理

陸續

題奏外所有據報覆查兩郡稻蕎緣由理合繕摺奏
聞伏乞

聖主睿鑒臣謹

奏

以手加額覽焉

雍正九年九月初二日雲貴廣西總督臣鄂爾泰

謹

奏爲滾塘勦撫已竣古州大局全定事竊照黔屬古
州地方道里遼遠山川險深村寨稠繁人丁頑悍
自歷經勦撫已八九就緒獨有下江滾塘等數寨
居黔粵水陸接壤之咽喉雖不敢逞兇亦不甘投
順恐將來把持道路阻截兵民出沒於新定之區
終無以善後是以復令鎮將等官假撤回粵兵路

過該地乘機料理臣已附摺

奏明在案陸續接據署古州總兵官董芳等稟報滾塘有內外二處在內者已願歸誠在外者亦有數寨求撫惟才瓦擺雪加的等寨約千餘戶因後路通連老荒山綿亘四十餘里與粵西思恩羅城兩縣地方接壤崇山深箐人跡罕至恃有退藏之地逞其頑抗之習若議懲創必先把截後路奪踞高岡方可進取但下江一帶從未加兵此舉實關係

各寨之觀望不得不慎重圖維該署鎮擬親統官兵仍派副將趙文英潘紹周施善元分領合攻布置已定於六月二十一日五鼓自諸葛營起程由水路前進順流迅速午刻即抵蘇洞江登岸鎮將等各選帶精兵盤坡越澗而進先見兇苗百餘人各執器械於嶺上排立吶喊官兵直上甫至半山隨有伏草兇苗突出拒敵官兵奮勇勦殺趁勢搶登山頂各苗勢不能敵即棄械潰逃時因日暮未

便窮追即就山梁劄營二十二三等日先分兵截
住苗寨後路即進攻才瓦加的兩寨苗衆帶傷奔
逃隨將該寨燒燬分頭追捕二十七日有蘇洞勒
龍二寨苗頭帶領塘根等十寨苗人赴營繳械查
此係未曾拒敵寨分當即收械准撫後才瓦加的
等寨苗衆亦央隣寨頭人求撫因其先既抗頑繼
復狂逞寨雖焚搗苗未剪除無以示儆戒遂逐出
不准復督兵搜擒遍歷山菁各有斬獲且得鎗械

甚多後將諸兇苗首級懸示各寨羣苗莫不戰慄而才瓦等寨餘孽尤魂驚膽落復將所有藏匿之軍器覓求勒龍寨頭人一併負赴營盤哀求饒命並願納糧當差察其情狀甚屬誠切當將諸苗羈留傳集內外滾塘苗衆訂期款諭時附近各寨及散處下江一帶百里內外寨分並住居深僻從前招撫未盡之苗未奉傳喚亦各背負鎗刀絡繹而至皆聚集營門輸誠請撫該鎮將等提出才瓦諸

苗嚴加斥責剴切宣諭該苗等感泣服罪誓願歸誠而各寨苗衆皆合口同聲願永爲良民誓無反覆隨經合款剝諭令各回安業料理事竣撤兵回營現在上下兩江遠近各處苗寨均已勦撫平定地方又約千里可圖又安等情臣查苗蠻之畏威每甚於感恩若威無可畏亦恩不知感故必先創懲而後收服庶足以懾其膽而堅其心此從來料理苗疆之大較也古州地廣苗多勢險習悍鎗礮

銳利不減於官兵故勦撫之役視各處爲倍難幸次第緩圖均有頭緒惟此滾塘等寨猶敢自居化外既當水陸之衝途復介黔粵之要害倘因事已垂成少有將就將來必生事端又滋搖惑是以臣故示嚴急俾知不了不休每痛責文武實亦不得已之施爲今董芳趙文英等毫無旁顧一照臣所指實力妥辦既無容縱亦不牽連遠近苗衆皆知畏知感而遠僻畸零之寨並不招自至繳械輸誠

楚粵江路通行現在商船皆直抵鎮協新城下目
下古州大局始可謂全定但得任黔文武各攄忠
誠加意撫馭絕漢奸之往來嚴兵役之騷擾勿有
事而隱諱致小成大勿無事而鋪張計賞希功則
數年以後將爲富庶之鄉即黔屬內地皆有所不
如臣亦與榮光而志願遂矣除將自七年冬以後
料理勦撫情形容敘疏恭報并續開新疆應添兵
設營酌調將備及一切善後調劑事宜另疏請

旨遵行外所有古州大局全定緣由合再奏

聞伏乞

聖主睿鑒臣謹

奏

覽奏

新疆添兵設營總不可惜目前之小費而

貽將來之大患詳慎爲之

硃批諭旨卷一百二十五之十七